

三
朝
野
紀

三朝野紀卷之六

江上遺民李遜之輯

崇禎朝

九年丙子正月內閣溫體仁奏逮問知縣成德之母辱臣於長安門又持本聲寃於朝上命下錦衣衛打問已于午門前杖德六十發成初德爲滋陽令耿介絕俗不善事上官偶處府廳積役府廳怒之揭於巡按禹好問開列多端証以貪酷致被提問及到京士民俱爲之訟寃長洲在閣時亦言之

至是好善再疏直言德係舊輔私人矣賴上不之究而德母各處投揭至隨體仁輿詬詈於朝門體仁畏之乃具揭奏聞竟罹重譴至十六年起廢陞兵部主事甲申之難母子同殉節死

曹欽程者以逆案問辟繫獄將十年同案之人俱已正法獨欽程尙存遂爲獄中牢頭鄙橫無耻每縉紳入獄卽需索萬端成入欽程亦如法索詐成大怒拳毆之數百一無所得而身被傷人共快之欽程後以闖賊破京釋放卽拜降賊

庭從賊而去不知所終

寧夏巡撫王揖馭下少恩一日於教場點兵下操
適聞有解到賞軍餉銀軍士遂紛紛求發揖不許
比夜揖入城至北門內軍士攔路求索揖命銷之
眾軍遂鼓譟稱亂持刀砍揖氣絕仆地而死事在
丙子正月從來邊軍多跋扈當元年甘肅兵變已
戕殺巡撫畢自肅矣至是凡再見云

淮安武舉陳啓新上獨違時尙䟽洒洒萬言其大
指則極詆進士之橫縣令之貪至發憤於腐爛蕪

儒欲并科目廢之專舉孝廉行漢法跪於午門奏進時上方行不測之恩威遂投契上意奉旨以爲敢言可嘉徑授吏科給事中吏部不能執奏舉朝無敢訟言惟劉宗周于條奏疏末及之言啓新言有大而近誇情似要而有挾未可遽定其品一言投契立置清華雖稱一時盛事將如名器可惜何後啓新官諫垣二三年庸庸隨時未有非常建白卒以敗類索訛得罪眞覺名器可惜也

時有候選庫大使程品疏奏斥啓新之虛誕欲

廢祖宗科目之制是絕孔孟君臣之脈上怒着
刑部提問擬罪其人雖亦未必端品然此疏足
愧舉朝之容默者矣

命兩京三品以上於舉人進士貢監中舉堪任知
府一員五品以下及翰林科道在外兩司知府於
貢監吏民中舉堪任知州知縣一員送吏部除授
部中先舉在京各官所舉共二百餘員開列上呈
命量才選用初旨原令卽授州縣正官遂大半以
營謀得之及部中類攷又復以賄爲高下至有考

授丞簿者諸人始各廢然于是有志者俱不屑就
究之亦未能得一人

劉宗周以特召至拜官工部右侍郎卽上痛憤時
艱疏畧曰朝廷有積輕士大夫之心自此耳目叅
於近侍腹心寄於武夫治術尙以刑名政體歸之
叢脞厥衛司譏防而告訐之風熾詔獄及士紳而
堂簾之等夷人人救過不給而欺罔轉甚事事卽
承獨斷而諂佞日長三尺法不申於司寇而犯者
日衆詔旨雜治五刑而好生之德意泯刀筆治絲

綸而王言褻誅求及瑣屑而政體傷參罰及錢糧
而官愈貪吏愈橫賦愈逋嚴刑與重斂交困而盜
賊蜂起總理任而臣下之功能薄監紀遣而封疆
之責任輕督撫無權而將日懦武弁廢法而兵日
驕將懦兵驕而朝廷之威令并窮于督撫朝廷勒
限盡賊而行間日殺良報級以幸無罪求治愈殷
紛更四出致市井雜流咸得摻訛抵隙以希進用
皇上不過始于一念之矯枉積漸之勢釀爲厲階
幾于莫可收拾今日轉亂爲治之機斷可識矣奉

旨夫論事當體國度時不當效小臣歸過朝廷爲
名高已閣臣以馬價空匱議捐助宗周獨言不收
懷利以事君并請禁天下之言利者得旨切責遂
引疾罷歸至天津知北兵自昌平深入憤甚復上
身切時艱疏畧曰往己巳之變有小人起而修門
戶之怨自此小人進而君子退中官用事而外庭
浸疎人人解體事事規卸文法日繁欺罔轉甚朝
政日隳邊防日壞以有今日之禍實己巳以來釀
成之也且以張鳳翼之溺職中樞而予之專政何

以服王洽之死丁魁楚等之失事而予之戴罪何
以服劉策之死諸鎮巡勤王爭先入衛者幾何人
不聞以逗遛詰責何以服耿如杞之死今幸以二
州八縣生靈結一飽颺之局廷臣之可幸無罪者
又何以謝韓爌張鳳翔李邦華諸人或戍或去豈
昔之爲異已驅除者今不難以同己互相容與耶
且皇上惡私交而臣下多以告訐進錄清節而臣
下多以曲謹容崇勵精而臣下奔走承順以爲恭
尙綜覈而臣下瑣屑吹求以示察凡此似忠似信

之類無往不出於身家利祿將聚天下之小人立
於朝皇上亦有所不覺矣又言小人與中官每相
比以爲引重而君子獨岸然有以自異故古有用
小人之君子終無黨比中官之君子末又及時政
最乖者數事以誰生厲階至今爲梗責備首輔體
仁謂其大奸似忠大佞似信且引唐德宗之不覺
盧杞奸邪爲規奉旨責以比私亂政顛倒是非革
職爲民已又上書體仁規其勿蹈江陵分宜之覆
轍體仁不省

劉公前後立朝皆不滿一年而諫草甚多皆鑿
鑿名論纏綿懇惻不減賈長沙陸敬輿也已盡
選入各臣奏疏中但擇其切關時事者錄一二
於此云

大學士錢士陞疏進四箴一曰寬以御眾如天之
覆賢愚并包功過在宥大絃毋急六轡毋驟不兢
不綵世躋仁壽巍巍蕩蕩大哉我后一曰簡以臨
下若網在綱要領獨挈條目畢張無爲守正垂拱
明堂執要則逸好詳則荒程書衡石徒敝章光一

曰虛以宅心如鑑斯空妍媸好醜畢獻形容寂然
不動感而遂通以意索照億逆填胸鄰鐵市虎載
鬼張弓一曰平以出政如衡斯準輕重毋倚哀益
必允舜貴執中孔戒已甚救弊矯偏叅調詳審畏
卒佈始罔或不凜時上已不悅未幾遂以論駁武
生李璉疏議搜括富戶事去位

自武舉陳啓新上疏邀特恩一時長安遊棍章滿
公車至有徑請召對者武生李璉一疏至欲江南
縉紳富戶報名輸官行首實籍沒之法疏下閣票

嘉善惡之遂擬刑部提問以進御批改票烏程曰
上方欲開言路當以所擬太重耳遂改擬姑不究
嘉善曰此亂本也當以去就爭之卽具疏言此衰
世亂政是使亡命無賴之徒相率與富家爲難不
驅天下之民胥爲流寇不止乞屏絕橫議毋使小
人因陳啓新之進以言利窺朝廷疏上而璉疏已
批下法司提問矣是疏則批云改票原欲申飭通
政何相疑至此卽欲沽名前疏已足致之遂請告
歸去其官而用其言一疏之有造於生民者大矣

先是有經歷吳鯤化上疏論雲南巡撫錢士晉貪肆烏程卽擬嚴旨行巡按究問回奏士晉係嘉善嫡弟蓋欲借其弟以逐兄皆烏程之機械也旨下而士晉已報病故事乃得解嘉善卒以是去

錢已去位御史詹爾選先有疏論陳啓新之用責備輔臣冢臣不能盡言執事復以疏言大臣所以不肯言者以不肯去耳今士陞肯言矣肯去矣以去就悟明主以氣節風百僚皇上不卽嘉許而疑

其要譽耶且天下之疑上者不少矣將卒驕僞日甚聖意恩禮過渥則疑過于右武穿札與操觚並課人見絀德而齊力則疑緩於敷文免覲說行或疑朝宗之大義不值數萬路費之金錢駁問日煩或疑明啓之刑書不當幾番加等之紛亂其君子惻驅策之無常小人畏陷累之多門明知一切苟且之政或拊心愧恨或對策欬噓種種隱情有難殫述上怒甚命錦衣衛拿問特御門召對面詰如何是苟且詹曰卽捐助一事也是苟且侃侃數百

言抗對無屈且曰臣死不足惜皇上幸聽臣言固可爲今日之用卽不聽臣言亦可留爲他日之思中璫在旁亦嘖嘖歎服上益怒命繫朝房候旨內閣揭救翌日旨下本當重處念輔臣申救姑着放了都察院議處初止議罰俸以議語涉誇并處主稿御史張三謨乃改議爲民

上以邊警仍分命太監盧維寧等總監通津臨德等處兵馬糧餉御史金光宸疏請罷遣上大怒於八月十六日召對廷臣是日下午恰值風雨驟至

閣臣部院侍立雨中至以袖障雨上召兵工各部
堂入厲聲云而今要練兵買馬製器械諸臣唯唯
上云平時都說口子是好的而今却從口子入了
平時都說有兵馬準備而今却没有這是甚麼上
聲色俱厲風雨聲亦復雜沓久之獨召金來前上
云你疏是甚麼樣主意你們科道官到這時候並
不說何利當與何害當除還說這套話光辰云皇
上因文武官員無一實心任事所以有這番委任
但這些事體別有委任武官一發好卸擔了上厲

聲云事到如今你們文武官員可羞可羞金云臣
巡按河南時見皇上罷撤內遣以爲是聖明第一
美政語未完上卽云不要是這等說連說數聲金
又將文武官員話頭申說一遍上云本該重處以
後再有這樣的定要拏問徐云該部議處諸臣仍
賜茶果而退

以張元佐爲兵部右侍郎鎮守昌平同時遣內臣
提督天壽山者皆卽日往上語諸閣臣曰內臣卽
日就道而侍郎三日未出何怪朕之用內臣耶閣

臣默然是年昌平陷乃內臣納假兵而起爲內應者

命調各鎮兵入援總兵劉澤清至河間擁眾不前疏言東撫李懋芳格標兵不發上怒下部議懋芳革職其實標兵三千而劉兵萬餘不相涉也自此以後總兵非復督撫可制而澤清更爲跋扈云至壬午之警王永吉爲東撫陷至七十餘城而以兵僅三千爲上所原反得陞薊遼總督不知三千兵從來如此當時撫臣所值有幸有不幸也

本兵張鳳翼自請以身當敵督援兵出師而以舊
本兵梁廷棟爲總督梁由南至張自京出北兵至
雄縣而返徧蹂畿輔破數十城二人但尾其後而
已北兵將去沿途括樹大書各官免送四字二人
慮敵退後且罹重罪因日服大黃藥取瀉求死北
兵以八月十九日出口張以九月初一日卒又數
日梁亦卒後下刑部議罪梁擬斬張免議以烏程
之故時謂張死亦不幸矣

北兵入至天壽山將諸陵寢殿拆毀兵退後撫按

奏稱忽有怪風從東北起祖陵門扇海馬獸頭神
路樹枝悉行括損有旨着估價修理上下相蒙不
復究竟而閣臣反以事平叙功加恩時新拜三叅
句容孔貞江夏賀逢聖南海黃士俊俱加太子太
保

邊警時適當鄉試屆期遂停不舉至事平後改十
月初二日爲初場 日揭曉

誠意伯劉孔昭疏論倪元璐素制當黜借明綸以
媚婢嫡妻陳氏現存而王氏居然冒封許重熙僞

士非祖敢居下以訕上實錄未成而五陵注畧先
刊行世蓋溫體仁乘文何二相旣去以倪爲二相
臭味必欲擠之去而後快言路部僚莫有應者因
以京營總督缺誘劉孔昭令之出疏奉旨下部看
議倪前妻陳氏有故而去再娶王氏皆名族女非
以妾冒封竟坐冠帶閑住議許除名禁錮不足明
罰宜下法司窮治體仁擬旨三上不允徑批許重
熙着革職後孔昭不得京營缺特復操江缺以償
之孔昭前此已叅戶尙候恂以媚溫矣

時上銳意取法世宗命近侍遍買坊間刻本如
見聞錄等項遍注畧初刻亦買進登御覽中有
誠意伯龔爵事頗致譏貶上覽而賞之孔昭聞
而懼遂因叅倪疏而併及許閣部俱擬窮究上
終不允云當時謂倪爲今之韓愈許乃得與之
比類同毀邪人之視許已不輕矣許後年將大
耄猶留心史事下榻荒齋者三年蠅頭小楷手
不絕書惜未竟其事而齋志以歿也

黃景昉主北闈試以馬之驥爲解元下第者吹索

字句投揭陳啓新出疏叅之景昉辨疏言吏科無
衡文之責啓新非能文之人上以御筆塗吏科句
意可知矣部議竟以覈字不雅議罰四科景昉降
級其逢迎啟新如此

方流賊蹂躪中原官兵攻之總兵曹文詔斬獲獨
多然以勇而驕爲賊所陷沒陞盧象昇總理五省
孫傳庭巡撫陝西與三邊總督洪承疇協力剿賊
孫久居邊疆習行間事虛身先士卒忠勇有爲率
關外兵一再破賊而孫洪亦時時以捷聞闖王已

誅蝎子塊已爲盧追逐入秦河南少寧自羣盜擾
河南北者三年夾河千里雞犬無聲賊旣無可掠
盧又合大軍於中原羅而蹙之寇已少衰及以邊
警調各兵入援事平卽改用盧爲宣大總督洪爲
薊遼總督而寇復蔓延矣老回回等盤踞鄖襄間
休糧息馬秋高足食乃以全軍合曹操闖場天諸
賊共二十萬沿江長驅而下斬黃六合懷寧望江
江浦所在告警烽火且及儀揚已自尉氏至登封
至汝南復入河南豫撫陳必謙輕撫被誘幾以身

洵爲按臣楊繩武糾劾解任削職以王家禎代之
兼總理川湖山陝督剿事務後亦以無功而罷

邊將祖寬勇敢善戰滁州五里橋之戰殺賊近萬
人總理盧疑多平民雜其中有無辜之嘆祖大怒
盧以異語謝之亦不能釋然也後洪調祖入陝剿
賊祖擒闖賊高某并其妻以獻其部下李自成收
其餘眾復自稱闖王闖部下又有張獻忠者榆林
人初號黃虎至是自稱八大王而天下事自此竟
盡於二賊矣山西巡按張孫振叅學臣袁繼咸婪

肆駐欵有旨拿解來京究問兼責撫臣吳姓何以
薦劾互異吳回奏言繼咸清公自矢學行兼優舉
薦自出公論繼咸到京因疏訐按臣之徇私囑托
事事有據三晉士民亦羣爲哀訟寃上察其非誣
命復繼咸官逮孫振下獄問遣後繼咸官至江廣
總督國亡被執全節而死可謂不負上恩矣孫振
以南渡時諂附馬阮復官官御史謀翻逆案誅鋤
正人與袁宏勳同爲一時之臣慙云

左都唐世濟疏薦霍維華邊才戶科宋學顯糾之

奉旨逆案中人不許舉用屢有嚴旨唐世濟乃敢
借邊才薦舉大臣如此欺蒙小臣如何底止着革
了職刑部提問吏部謝陞因奏憲臣謬薦匪人臣
在病失於查叅蓋二人原同心阿附首揆薦維華
原出體仁意使世濟先言嘗試陞僞爲不知其狡
如此及奉嚴旨問罪遣戍體仁亦憚上嚴不敢爲
之地謝亦以此失上眷去位矣未幾福建巡按應
喜臣薦地方人才中及逆案之周昌晉因大理寺
副孫杰疏劾亦命逮喜臣問遣刑科王都又劾刑

侍郎章光岳在通政時請逆案中有枉者辨疏許其封進御史水佳允有疏請吏部將逆案中有不平者明告二人皆當究處部覆光岳引退佳先以別事處免議都又劾吏尙田唯嘉當王永光借題邊才唯嘉卽薦楊維垣賈繼春二人光岳薦呂純如霍維華傅樾徐楊先虞廷陞葉天陞六人夫世濟喜臣薦一人而拿問薦二人六人者宜何如時田方新經簡任眷遇正切召對出疏示之論不必置辨

蘇松學臣倪元珙回奏據道臣馮元颺知州周仲
璉申文大約言復社之士文行相先並無把持武
斷之事陸文聲作奸犯科憲檄拘提逋逃在外懷
恨入都借復社發難耳有旨復社結黨恣行所關
世道人心不小倪元珙狗州縣申文扶同誇詡都
著議處元珙等各降調是時復社主盟首推二張
張溥張采銳意矯俗結納聲氣間有依附借名者未免
輿論稍有異同烏程當國因惡諸正人欲爲一網
清流計正思借題生事文聲本一無賴見陳啓新

之拔用遂效尤建言希圖進身故借復社爲題迎合政府而蘇州推官周之夔業以漕事罷官恨及二張亦疏訐復社生徒妄立四配十哲名目濁亂一時皆溥來爲之倡政府徇其意皆票旨嚴究大開告訐之門同時又有常熟奸民張漢儒奏訐錢瞿二官事

十年丁丑正月張漢儒者常熟邑民奔走於諸大家爲門幹後又投充糧衙書手以事犯革遂并不容於鄉里不得已棄家入京遇有同邑陳履謙亦

以事犯在京出入縉紳之門因相謀議欲訐奏豫
撫陳必謙暨縉紳某人以報私怨而以錢謙益瞿
式耜二人爲首輔深仇遂草成奏䟽開列多款先
於朝房呈之體仁體仁首肯顧其注毒在錢瞿且
恐人多則起上疑因去陳與某而止叅二人投通
政上之體仁竟擬嚴旨着撫按提解且以不行糾
察責令回話旣下刑部究問賍款又發撫按詳鞠
屢問屢駁株連不已虞山因營謀求解於曹璫曹
故王安名下也以所作安碑文爲証曹覽之泣下

乃盡力爲之營救而陳履謙復獻詭贓出首之計
先具一匿名揭有款曹擊溫等語隨令王藩出首
云虞山賁四萬金托周應璧求款于曹烏程卽具
密揭入奏上以其揭示曹曹懼甚自情窮究其事
先是衛帥董琨定招以匿揭爲根據以王藩爲確
証應璧堅執不認董琨逼勒成招事頗彰著曹璫
奉旨嚴究大加搜訪備悉履謙父子奸狀擒到厥
衛訛問招出漢儒草疏王藩出首併伊父子捏造
款曹擒陳和溫六字又改和爲擊等情歷歷有據

獄上張陳王俱廷杖一百立枷死烏程亦放歸蓋
由曹盡發其奸知漢儒之疏匿名之揭王藩之首
皆其主謀前此總憲薦霍謀翻逆案尤其指使也
烏程每與大獄必稱病以聚謀謀定而後出是時
修理湖州會館方擇日移居疏上邀宣諭卽出矣
淄川已票留御筆書放他去閤票有人夫祿米等
項御筆抹去疏下出不意方食失飭人心稱快錢
瞿旋各坐贖徒去

烏程旣去又復枚卜綿竹劉宇亮進賢傅冠陞禮

部尙書韓城薛國觀

原左食都御史

陞禮部侍郎各兼東

閣大學士旨下着與輔臣至發協同辦事不稱首
輔有與至發密者勸且稱病至發云無案賤體頗
康直至半年後一日偶有宣賜稱首臣至發遂卽
日廷謝編修吳偉業疏言願至發以體仁爲鑒體
仁學無經術當練達朝章體仁惟習諂諛則當矢
志光明體仁狎昵小人則當嚴杜譎訛體仁護持
逆黨則當力褒忠孝毋効其泄沓偷容毋似其游
移飾詐近日辨揭盛稱體仁之美曰孤執曰不欺

夫體仁有唐世濟吳振纓之徒忝贊密謀有陳履謙陸文聲之徒驅除異已何言孤庇樞貳則總理可不設而事敗乃設庇鳳撫則鎮可不移而事敗乃移何謂執必因私踵陋盡襲前人所爲將公忠正直之風何以復見也

南祭酒許士柔以撰原任左都高攀龍贈官誥命爲輔臣張至發糾其違式命降二級調用故事兩制專屬詞臣而贈官誥文則誥敕房中書據爲職掌大臣子弟欲表章先德以中書撰文未盡善也

每請詞林名公爲之崇禎初元褒贈死難諸家誥
文盡出詞林手獨高忠憲誥文雖作而以軸缺未
領至是閱八年矣其家請補給仍錄許原撰文以
進時已奉旨申飭不許用駢體文中書官遂挾摘
其制誥獻之中堂至發以許爲倪黃之同年友方
爲時忌正欲引繩披根特揭叅之遂奉嚴旨忠憲
誥命亦遲回不敢請矣大司寇鄭三俊給諫何楷
各疏言皇上自處撰文違式者耳非謂高攀龍之
清忠勁節有煩擬議也始得旨另撰文補給

東廠緝獲福建泉州府吏員許馨來京打點爲興
泉道曾櫻謀陞浙江按察使央考功葛主事文選
郎中說分上有元寶八錠奉旨各犯下鎮撫司
嚴究曾櫻革職拿問曾居官清執忽有此事眾共
疑嘆御史葉初春爲訟言之撫按亦爲之稱冤漳
潮總兵鄭芝龍疏稱其廉明公正龍感其德代爲
之營陞其實與櫻無干願以官贖罪上已鑑悉准
令櫻復官起用芝龍圖功自贖

鄭芝龍福建南安人其父故泉州府吏也曾受知

府蔡善繼恩芝龍聚衆雄行海中時浙有李魁奇
廣有劉香與芝龍爲三蔡再起爲兵巡道以巡撫
熊文燦命招撫之芝龍以蔡故屈意投降題授副
總兵鎮守漳泉惠潮地方魁奇爲香所誘犯浙江
及南直芝龍用計擒斬之香亦相繼爲芝龍擊敗
走死

特起楊嗣昌爲兵部尙書時方守制疏辭不允令
奪情視事舉熊文燦爲四省總制專剿流賊文燦
撫閩以招鄭芝龍成功至是亦主議撫張獻忠等

遂詐降投誠文燦信之授之以官獻忠跋扈愈甚
刦殺自如撫議卒敗文燦遂以庚辰年伏法死

河南巡按張任學疏云臣書生也於龍威丈人之
秘雖無所窺而以二十五年之學問爲皇上練此
勘亂之經綸以答祖宗養士之報誠自信於中矣
皇上不以臣爲不肖乞下部院集議將臣改爲總
兵官行當四征寇□雪國恥而復生民之仇云云
奉旨下吏兵二部都察院集議以爲御史改總兵
實從來未有之事請仍以監軍御史兼署總兵銜

爲便聖旨以任學忠勇可嘉准改授署都督僉事
充河南總兵官

按張係乙丑科進士四川保寧人由知縣考選
御史先巡鹽浙直再差巡按河南自請從戎可
謂慷慨直前之丈夫或者謂其本欲謀得巡撫
故請從戎不知此時中州撫缺人皆視爲畏途
竟可不謀而得何必改武銜然自改任後仍未
見有殺賊奇功踰年竟以失事逮問亦見當日
任事之難矣

上以任正清苑涑水遷安大城定興通州各有司
不法命逮問責撫按不劾爲溺職先是有固安知
縣秦士奇撫按遣官奉旨搜私宅得銀七百兩坐
贓論戍大同僉事劉彝鼎因撫臣薦疏批旨云彝
鼎貪污狼籍着會同監視叅來重處遂逮問遣戍
蓋實由中璫毀之也自此外任官皆不得不以調
停大璫爲事矣先是丁丑年又有潘益達白慧先
皆近畿縣令中旨命御史叅奏提問

十一年戊寅三月初七日皇太子出閣講學閣中

先期題侍班曲四人姜逢元姚明恭王鐸屈可伸
講讀六人方逢年項煜劉理順吳偉業楊廷鱗林
增志校書二人楊士聰胡守恒侍書二人中書朱
國詔黃應恩舊制日講官東宮講官無相兼者恐
上與東宮同日御講筵不能兼也且應恩既充正
字又充侍書皆以至發不諳衙門規例故惟應恩
攘之耳項煜楊廷鱗各上疏願讓黃道周奉旨不
得矯讓至發揭辨云道周清品意見少偏如近疏
有不如鄭鄭語夫杖母何如人而自謂不如是可

謂元良輔導乎時鄭獄尙未成章此揭者黃應恩也給事馮元飈疏言道周至清無徒數忤執政項楊二臣退然自下爲大臣者正應嘉嘆而至發一揭大不快其言并遷怒道周何也至發出揭辨又上世風宜挽疏累數百言內云道周出山緣愛母之心惜一言以周旋鄭鄭豈曰非孝但不宜以朝廷是非之公爲一己環草之私又云一二人焉建壇坫執牛耳自命於人曰吾將主持世風已而自命者與附之者入主出奴了不得其何緣何故末

又請禁投刺往來自今士大夫門盡可羅席盡可
塵夫人而能爲廉也夫人而能爲讓也而推重於
溫體仁頌其孤執不欺竊願學之云云或言此疏
亦出應恩代草

本兵楊嗣昌之父鶴以三邊總督逮問遣戍至是
甯夏叙功復官給誥命舊例贈卹誥命中書撰文
者爲之應恩爲楊鶴撰文極力洗發進呈上塗抹
發下令查職名議處溜川欲一公揭申救孔句容
曰去年許士柔事正與此同彼時未申救今奈何

救之淄川憤曰難道閣中少得此人我自救之連
上三揭上不允御批云撰文自註職名新經申飭
應恩供役閣中首先違玩人臣功罪各不相掩蒙
寬等語視當日之處分爲何如應恩着革爲民嗣
昌亦上疏救不聽旣而大理寺副曹荃疏叅首輔
并應恩納賄諸事件奉旨首輔素矢清慎何得牽
詆應恩刑部提問

鄭三俊爲刑部尙書適當科臣宋之普以馬豆事
叅戶部尙書侯恂下獄先有讒言爲三俊與侯恂

皆東林與友必且屈法徇私上入其言獄上果多
爲徇卸罪上大怒并三俊亦下獄宣大總督盧象
昇先具疏稱寃盧昔爲鄭司屬素服其清公也繼
盧上疏者不下十餘人應天府丞徐石麟疏尤剴
切閣票回話法改閣票爲民又發改閣票提問御
批云可將三俊罪狀一一講明不必更處奏事官
閣中擬旨進卽批出

時當考選行取官旣集推敲詞林臺省雖據官評
而亦別有營私者陳啟新疏論其事奉旨指實回

奏又旨下吏部將訪冊進覽特處圈多濫徇者卿
貳中姜逢元王業浩閒住科道中傅元初六人閒
住孫晉三人降調劉含輝等十一人降級照舊敕
新回奏指涇縣尹民興江都顏允紹及同鄉預定
之陸自嶽部覆各降處田唯嘉乃請先推部屬所
推共二十二人輿論譁然與推者各懷不平獨成
勇恬然無怨色不數日辭朝赴南京吏部任去矣
二月十一日御經筵畢召詹翰諸講臣顧錫疇等
二十餘人問保舉考選二者孰爲得人諸臣各以

大意虛對黃景昉獨以鄭三俊下獄及朱天麟成
勇不得與考選對上細詢良久諭以三俊蒙狗徒
清亦不能濟事至成朱二人則李建泰以下同聲
爲之稱屈上命起序立有言獨奏諸臣各陳所見
上曰言須可行如先年講官姚希孟欲將漕米改
折一年這箇行得行不得楊廷麟奏自溫體仁之
薦居世濟王應熊之薦王維章今二臣皆敗而體
仁應熊無恙是連坐之法先不行於大臣欲求保
舉之效得乎上爲色動久之無所言項煜乃奏成

三
勇不得考選以任濬爲閣臣至發兒女親家前任
濬列第二後以有議以成勇易之閣臣不欲勇獨
得考選若曰得則俱得失則俱失云爾上曰誰沒
有兒女親家也不在此至發奏請敕撫按勘臣與
濬結親或現在或已亡有一於此則治臣罪上諭
以不必與辨對畢出

次日黃堂周余煌黃景昉楊士聰各有疏而田隴
嘉亦有疏直攻楊廷麟云成勇輩各爲同鄉所引
臣一旦推之部屬安得不觸諸臣之怒廷麟以推

部之涂必泓係江西人特借成勇天麟爲口實耳
至聶明楷係伊同鄉萬谷春保舉臣且叅革并谷
春降處是以恨臣以保舉考選爲不公也奉旨接
引主持有何憑據且原傳黃景昉何訛爲楊廷麟
還着明白具奏十六日御日講面諭景昉昨原切
責鄭三俊豈是矜亮又諭余煌昨諭有姚希孟全
折漕糧一年之語煌對行不得此疏如何不載又
越日御門畢諭百官數百言內言鄭三俊一案此
豆墻穴情弊顯然有何可疑而欺罔推諉巧爲彌

縫屢奉批駁訛法愈甚但念別無賍賄姑着回家聽擬蓋聖明本樂受言特不欲恩歸於下耳

姚宗典曰凡日講講畢附論時事一段猶省臺之條陳也先文毅進講在己巳庚午間時入夏始兌糧阻凍閘河須待來春始得交納京倉較之祖制十二月兌糧二月開幫五六月到京交納七八月回空何啻天淵故引及之或不改折一年以通其窮亦作商量語耳若使斯言果拂聖意亦必面賜誚讓如余煌矣乃歷庚午至壬

申值講又三年蒙恩如一日何既賞之於生前
反繩之於身後蓋時當請恤忭先臣者實多以
例無可駁乃摘其講讀之謬駁之冀以此斥先
臣也

王維章所至以貪墨著備兵西甯以剋削致軍
變應熊力庇之舉爲四川巡撫至公然形之揭
奏云維章臣畏友益友也等語及任四川後以
賄敗時無敢言之者

賜士聰回奏跪下又叅及史堃巡撫淮揚署巡鹽

事侵匿課銀二十一萬有旨着回語堊奏臣孤立寡援屢奏奸惡向年文震孟姚希孟爲詞臣之雄死者死矣震孟借虛名以入閣入閣便行私去後復草疏稿募成德代上臣曾有綸扉之線索一斷議論之風雨寂然二語故士聰借考選事硬以線索二字誣陷臣也士聰復上聖主神明燭弊疏列唯嘉納賄事欵奉旨提其家人下錦衣衛究問唯嘉旋以此去已又逮其子敬宗下獄同家人田登第等俱問邊衛充軍仍追贓充餉

南科張焜芳復疏叅史堃巡鹽駐私狼籍等事御批云史堃鹽弊多端比匪攫利大干法紀與汪機俱革職并吏雖承吾俱拿解來京究問堃以十月十二日得報隨卽赴京潛入薛國觀寓謀定乃投獄上疏辨謂昔年以叅劉鴻訓錢龍錫爲朋黨構陷并及楊士聰馮元颺諸人又言焜芳爲中書炳芳之兄向來旨意洩露皆炳芳爲之疏下閣擬票上發改再三最後擬楊馮俱革職焜芳提問上不許御批云不欲牽累多人乃票焜芳革職候訊上

提書吏余伯和問此疏實出黃應恩構造欲設謀
相陷也堇奉旨行查後巡鹽太監楊顯名回奏爲
之彌縫惟於交際六萬兩則云臣不能爲之諱以
故堇久稽獄中未幾邊警至此案遂不結堇竟責
死而事始釋張至發因曹筌疏叅連疏請勘奉旨
卿連疏請勘心跡愈昭何足與辨云云張乃上疏
求罷云臣佐理無能當去諧世無術當去竊位妨
賢當去一去而揆路清羣搆息朝議不至紛紜天
憲不至屑越娓娓百言終篇無一病字昔所云賤

體頗康者果於此疏見之奉旨有回籍調理語時人傳笑以爲遵旨患病云然以首臣去位成例昭然而百金之賞半裁行人之送復罷揆席漸輕往規又一變矣張去而孔爲首至六月中亦卽放歸票旨亦同僅賜路費五十金彩段二表裏而已四月十二日上御經筵畢召對六部問邊事本兵楊嗣昌奏有善戰者服上刑等語上諭曰此事孟子言六國兵爭事今大司馬彰九伐之威當明春秋大一統之義奈何云此隨戒以今後勿復爾時

上聲色俱厲又言楚撫余應桂用將官事嗣昌言
應桂任御史時曾有疏叅臣父臣今不敢以私心
駁其所用之人先國家之急而後私仇也未幾嗣
昌入閣應桂就逮其轉移甚秘人不得而測矣

二十八日上御中左門召候考諸臣親賜策問勦
寇需兵養兵需餉屯鹽採鑛難取近効搜括加派
民力已竭將何策以處此又□□抵邊不犯而退
是何狡謀各悉心以意見條對欽定取曾就義朱
天麟等五員爲編修張縉彥汪偉等五員爲簡討

王調鼎熊維典等一十二員爲給事中李嗣京等
二十六員爲御史閻嗣科葉樹聲林蘭友詹兆恒
爲南道御史其餘並授各部主事時沈迅張若麟
但授刑部蘇壯已陞同知成勇陞南吏部先出京
不與考旋以涂必泓言援成勇爲南御史後以論
楊嗣昌奪情入閣革職逮問越數日上又傳諭吏
部將會就義等條陳擇可行者各酌議具覆曾就
義江西人作縣頗著清名對策中言百姓之苦皆
由吏之不廉使守令盡廉卽稍從派以濟軍需未

爲不可上喜其說遂擢第一詞林未幾卽有練餉
勦餉之加

五月火星示變上於宮中齋沐祈禱素服減膳并
諭各衙門素服修省樞臣楊時昌嗣方倡款議遂
借星變援引前代事疏奏云科臣何楷疏駁之云
嗣昌引建武款塞故事欲借以伸市賞之說也引
元和宣慰故事欲借以伸招撫之說也引太平興
國連年兵收故事欲借以伸不敢用兵之說也其
附會誠巧至永平二年一條所述皇后馬氏等語

更不知其意所指斥何在且前言后妃後言陰宮一篇之中三致意焉是何爲者卽得旨不必深求是時傳田貴妃與中宮不相能上亦久不見中宮故嗣昌疏中隱伏挑激語爲何疏叅破嗣昌隨有辨疏其詞甚危而於市賞招撫之說絕不一及蓋前召對善戰上刑之說其機括已陰轉矣說者謂楊之大用實借徑於田貴妃以後有悼靈王事嗣昌疏請持誦華嚴經時方在楚中督師僅隔旬日而疏至益信其交結有自云

六月十八日召府部卿寺院官集中極殿考閣員
親命題云天象頻仍今年爲災甚烈金星晝見已
逾五旬四月大雪凍斃人畜朝廷腹心耳目寄托
臣工有司舉劾讞尤易起枉直難分寇尙未滅勦
局難更□□生心邊餉久欠民貧旣甚正供尤難
侵剝旁出如火益熱至操守清謹者又多自傲遂
非必須處署得宜禁戢有法卿等出能體國才足
濟時其悉心條對先因會推三次俱不愜上意至
是拔兵部尙書楊嗣昌戶部尙書程國祥禮部侍

郎方逢年工部侍郎蔡國用大理少卿范復粹俱
入閣辦事嗣昌仍帶管兵部事時尙在制中也當
日舉對者三十餘人天方大雨對畢命題已近一
鼓多草草了事蓋上意已定特以考爲名所最注
意者獨嗣昌程則以房號蔡則以牙石二字得上
心耳范與方不過其攜帶者耳房號者借合京賃
居一季之租及天
下自館住者亦出修理若干初爲可得五十萬其
後戚曉熈臣巨璫聚從隱匿所得僅十三萬而已
牙石者崇文宣武兩入街列之於中以備駕出而
除道者時培修外羅城不及取石蔡建議用此然
用力艱而二費浩所得不償
失也二臣之受知止以此

宣大總督盧象昇疏報丁憂上命料理候代員缺該部速推有不拘在籍守制之旨部因推陳新甲往代時新甲亦任制中嗣昌欲援以自解也於是詹事黃道周連上三疏其一言天下無無父之子亦無不子之臣衛開方不省其親管仲至比之豺豕李定不丁繼母憂宋世共指爲人梟今遂有等待兩服坐司馬堂如楊嗣昌者自有嗣昌而海內無行蒙垢貽禍其親者皆擲塊投杖思攘節鉞之柄今盧象昇搥心泣血以俟奔喪又忽有并推在

籍守制之旨夫使守制者可推則是聞喪者可以
不去也聞喪者可以不去則是爲子者可以不孝
爲臣者可以不忠也夫人遺其親必不利其君壞
於家必不成於國嗣昌在事張網溢地之設款市
樂天之說才智畢覩又更起一不祥之人與之表
裡指鳬指馭說夢描風猶狼狽之獸倚肩並走亦
何益於負重者乎其一疏言頃會推陳新甲聞其
丁艱猶未終制又聞其走邪徑托捷足天下卽甚
無才未宜借及此也凡論人才觀其所難則知其

所易批龍鱗之難難於履虎尾冒斧鑕之難難於
冒鋒鏑今諸負氣節敢直言者半棄不錄欲使諸
軟美容悅者叩頭折枝以建非常之功豈可得乎
古亦多有忠臣孝子無濟匡攘之用者決未有不
忠不孝而可進於功名之途者也天下卽無人臣
願解清華以執鎖鑰何必使被林負塗者祆不祥
以玷王化哉其一論遼撫方一藻引隆慶通市故
事今日情形之不同者有五事之不同者亦有五
卽款矣成矣以視甯錦遵薊宣大之師何處可撤

者而謂欵□之後可撤兵以討寇乎因又言兵之不可撤者有十乃諸臣共爲欵局陰設不得不欵之情惘疑聖衷陽設不得不欵之形搖惑眾志違撫旣無成謀而內受算於樞臣樞臣又無成謀而外受算於遼帥三窟分營鬼技千出不幸而成則逃責於朝夕之間貽釁於三年之後掠蟒王以賒膏斧幸而不成則委過朝端謬稱築舍安爰禍敗以自爲是是豈臣子所爲乎是時內外合謀已陰遣賄者周元忠往來商度此事矣惟此一疏直書

斥之

七月初五日上召對廷臣於平臺先召吏部尚書
商周祚侍郎董羽宸責以會推閣臣多濫狗次召
戶部署部侍郎許世璽諭以備邊要多備儲糧再
次召兵部楊嗣昌問邊報各路情形嗣昌對此時
或無大舉又問流賊情形嗣昌對洪承疇用兵久
漸有成效孫傳庭亦有才用兵動支屯課不待勦
餉尤爲難得次召刑部尚書王命濬諭以刑獄之
事只是情法理處公愼又諭獄情宜疏通保候各

犯宜速審結次召工部尙書劉遵憲侍郎李覺斯
論以南北城工等宜速完次召都察院左都鍾夔
僉都徐爌論以考核諸御史宜嚴曾頒憲綱未見
遵行次召少詹事黃道周上曰朕幼而失學長而
無聞時從經筵中畧知一二無所爲而爲之謂之
天理有所爲而爲之謂之人欲爾三疏適當枚卜
不用之時可謂無所爲乎道周奏天人只是義利
之辨臣三疏皆是天下國家綱常名教不曾爲一
己之私所以自信初無所爲上曰前月二十八日

推陳新甲何能當日成疏且說厄於時會何也道
周奏因同鄉御史林蘭友科臣何楷皆有疏恐涉
嫌疑上曰今遂無嫌乎道周奏天下綱常邊疆大
計失今不言後將無及上曰清原是美德但不可
傲物遂非如伯夷是聖人之清若小廉曲謹止叫
做廉不叫清道周奏陳文子不能強諫大節不可
觀夫子說他清而未仁夷齊大節可觀所以說他
是仁上曰你可說仁智勇就是清任和亦多牽強
道周將仁智勇誠明之義辨說一番因言綱常名

教禮義廉耻皆根本上事如無根本豈做得事業
奏未畢輔臣刷昌出班跪奏道周論臣止爲奪情
起復原非常理臣曾具疏再辭若綱常二字臣不
敢不剖明白君爲臣綱父爲子綱君臣還在父子
之前古來列國君臣可以去此適彼今一統君臣
爲臣子者無所逃於天地卽臣父母皆受君恩而
無所逃臣又逃於何所祖宗朝非其人不奪情臣
控辭不獲命意詞臣中必有博通經義者可以代
臣力言回天問道周爲人所宗意必有持正之言

今謂不如鄭鄭臣始嘆息絕望鄭鄭杖母禽獸不如道周又不如彼還講甚麼綱常道周奏大臣聞言義當退避未有跪在上前爭辨不容臣盡言者嗣昌奏臣爲綱常名教不容不剖委覺非體望皇上用道周而放臣上曰這疏也不爲奪情近日人情各有所爲道周奏臣爲一人之私只用緘嘿自取富貴何可與他對辨上曰你無端汙詆大臣又以大題目說他不得不辨道周奏臣與嗣昌比肩事主比不得詆毀大臣臣自少讀書于今五十年

無一事不可對君親上曰旣如此又說不如鄭鄭道周曰臣原說文章不如上曰你說陳新甲走邪徑托捷足何爲邪徑疏中軟美容悅叩頭折枝者是誰道周奏人心正則行徑皆正邪則行徑皆邪新甲在蜀中聞命辭謝往復須八九月不得來盧象昇又不得去嗣昌在司馬堂則可在政府則不可嗣昌一人爲之則可呼朋引類使成奪情世界則不可上曰朕正要再問鄭鄭五倫盡絕許曦等等說他罪狀甚明雜職到有公論道周奏臣若有

心功名富貴只當附和說鄭鄭不孝豈不能取悅
正是臣無所爲方今獨立敢言之人少讒諂面諛
之人多故臣不得不言上曰少正卯當時亦稱聞
人心逆而險行僻而堅言僞而辨順非而澤記醜
而博不免孔子之誅今人多類此道周奏少正卯
心術不好臣正無一毫私上曰前以爾偏激稍示
裁抑後聞操守隨即賜環前日署天仍成一篇文
字才亦可愛不圖這樣恣肆道周奏臣今日不盡
言臣負陛下陛下殺臣則陛下負臣上曰你的話

都是虛話一生學問止學得這張佞口起去罷道
周叩首起復跪奏臣還將忠佞二字奏明人臣在
君父之前獨立敢言者爲佞是在君父前譏諂面
諛者爲忠耶忠佞不分邪正不明矣何以致治上
曰不是輕易加你這個佞字問你這邊便遁在那
邊非佞而何若論紅脾轉換支梧就當斬道周起
諸臣各叩頭退上又召回諭曰朕不才不能威發
諸臣公忠爲國之心不智不能辨別是非邪正不
文不能宣布德化不武不能削平禍亂凡此皆朕

之寡昧卽朕之愆尤關係國運世道人心今一等
機械存心的專於黨同伐異假公濟私纔簡用一
大臣百般詆毀律以祖宗之法當何如今□寇還
易治衣冠之盜却難除以後再有這等的立置重
典閣臣以下皆承旨浪道周降五級調外任

同時疏論嗣昌奪情者自何楷林蘭友外又有修
撰劉同升編修趙士春皆奉旨降三級調外任南
京兵部尙書范景文等公疏請允嗣昌守制召還
黃道周何楷等上責其朋謀把持查主稿何人景

文再疏認罪命削籍爲民南道御史成勇疏言臣
見嗣昌疏有仁不遺親義不後君之語反覆辨論
無非避不忠之名是嗣昌猶知有君親猶可以忠
孝之言告也今卽就其言詰之嗣昌謂古之君臣
列國之君臣可得而避今之君臣一統之君臣無
所逃於天地之間是三年之喪可行於古而不可
行於今不知嗣昌所引者何古所指者何臣所據
者何代之經何國之典豈非聖諭所謂另一邪說
者耶信如其言是凡爲臣者皆不當終三年之喪

終則爲後君爲不臣先聖之詩書可焚先王之典

禮可廢不舉人類化而爲禽獸不止也上責其黨

同伐異命遠問

先是道周疏御筆票輕處謂昌懼其復用也急募張若麒上疏言道

周備六藝以文好言務在假托道理以犯持朝廷顯行其引類呼朋之計又有老魔之赤熾既拔山魃之穢態難藏等語未幾若麒遂以刑部改兵部矣至壬午年寧錦告急若麒奉旨閱視遂臆催戰以致百沒甲申陽賊之變麒麟膝投誠得受僞官其人本末如此

張若麒既營求嗣昌調部有日矣御史涂必泓忽出一疏言刑部所司民命而人多厭薄之是以司官強半皆鄉科任之偶有一甲科輒調別部豈司

民命者當專用不肖乎請著爲令刑部官不許更
調奉旨申飭若麒憤無所洩乃出平賦役疏謂鄉
紳隱匿賦役遺害小民內有鄉紳豺虎等語有旨
鄉紳豺虎等語據實回奏若麒乃指莊應會范良
彥表宏勲奉旨俱行撫按逮問若麒初意因與同
鄉高宏圖爭一庄田構怨將指及之或告以宏圖
立朝大節忤璫去位萬不可誣誣之必于若麒大
不便不得已以三人充之表范皆巨惡袁尤逆黨
護局之魁也然張之爲此實涂疏激之使然涂與

楊廷麟同鄉同年遂疑楊實使之後與嗣昌比所以修怨於楊者不可解矣

戒諭皇親駙馬不安分義受投獻霸占者許科臣糾叅又諭周奎田宏遇袁祐尤非他比宜先率禮爲諸戚臣倡袁與田係貴妃人也袁妃居翊坤宮田妃居承乾宮袁僅生一女寵愛去田遠甚祐亦謹畏與宏遇相反宏遇好結納縉紳皆樂與往還承乾宮鋪設皆宏遇外備古玩時器及壁間字畫無不精好妃又洞曉音律管絃琴奕色色皆工間

侍上鼓琴聖情悅豫上因誇于國母曰后獨不能此乎國母正色對曰妾本儒家惟知蠶績且曰妃從何人授指法上色動妃自言妾母所教遲數日妃母入宮實能鼓琴上意始解

武清侯李誠銘慈聖太后

神宗生母

內家也上以國用

匱乏爲憂閣臣薛國觀首謀勸借言在內惟戚畹非上獨斷不可因以武清爲言遂傳密旨借四十萬金李氏初不在意督之日急武清死督其子國安國安死提其家人追比房屋俱行入官有一女

字嘉定伯之孫嘉定請命于后后云人當患難自
無絕婚理但取此女歸勿攜一物也請戚畹合詞
請寬不允戚畹遂人人自危後因皇五子病亟有
九蓮菩薩下降之語又見慈聖于空中上大悔悟
諭停追比武清侯爵房屋祿米仍頒給焉

上初年崇尙天主教徐上海教中人也既入政府
立進天主之說將內殿供養諸銅佛像毀碎至是
悼靈王病篤上視之王指九蓮娘娘現立空中歷
數王爺毀壞三寶之罪及苛求武清云云言訖而

堯上乃痛悔前事頻諭內外有但願佛天祖宗知
不願人知等語幾不成皇言時閣臣皆從外入不
諳文義宰相須用讀書人初年曾舉以諷諸臣至
此何仍懵然

樞輔楊嗣昌上四事機宜疏請於卿寺科道等官
不拘常格推補臣部侍郎其久推不至者俟其到
日于別衙門填補蓋指惠世揚吳甦也末云職方
一司素冗之極時設協理員外分任其勞而余爵
久推不至請以武選主事孫嘉績升補而車駕主

事漆嘉祉等到任無期請飭吏部遴選別部有才
望者速行調補翌日吏部題沈迅調武選張若麒
調車駕沈既調卽上疏條陳選務一云州縣無重
臣彈壓故敵所至輒陷請于定州蠡縣廣平河間
等處添設兵備一員一云以天下僧人配天下尼
姑編入里甲三丁抽一朝夕訓練可得精兵數十
萬其餘條陳別事多類此嗣昌具覆盛稱其言可
用請改迅科員有旨沈迅着改兵科給事中
九月 日以邊警命丁憂總督盧象昇留督天

下勤王兵入衛初三日漏下二鼓傳聖諭平臺召對盧卽策馬夜詣都門平明入朝上諭遠來入衛忠勤可嘉賜花銀蟒幣畢問方畧如何象昇奏命臣督師臣意主戰上色變有頃曰朝廷原未言撫這都是外廷議論又曰勦□與勦寇不同鄉宜慎重先是樞部曾以舞干羽于兩階七旬有苗格喻□宜撫上云此與三苗不同三苗止貢固不服□乃凌犯天朝所云撫議實出外廷信有自矣

十七日嗣昌赴軍中會議盧面折之曰公等堅意言撫獨不聞城下之盟春秋恥之且象昇叨承劍

印長安口語如風倘唯唯從議則袁崇煥之禍立
 至况麻衣引縶之身既不能移孝作忠將忠孝胥
 失何以戴顏面於人世乎時嗣昌並在制中不覺
 色戰心忤奮言曰若如此說老先生尙方劍當從
 學生用起矣盧曰尙方劍當從自己項下過也不
 能藏敵正水易以加人若舍戰言撫養禍辱國非
 某所知也已復以手書折之云若濟獲封疆之事
 卽胸中有如許怪事始終不向君父一言倘閃鑠
 奸欺到底當瀝血丹墀無言不盡也

嗣昌自刻中
 樞集備載盧

書想其良心亦有所不能諱不覺自暴其罪矣於是嗣昌益用慚沮定計置之死地矣編修楊廷麟疏言東西從約墻嶺失事楊嗣昌主款之誤至此極也因策事之可憂者在外有三在內有五且言督臣盧象昇以養寇責樞臣言之痛泣夫南仲在內李綱無功潛善秉政宗澤隕恨陛下宜及此時正言款之罪諭督臣集諸路援兵別其強弱以分險易及今一創當必不敢再犯凡天下之功不成於智而成於愚愚者之才不生於功而生於學陛下毅然內斷先治內以

治外使諸臣以學自衛以愚衛國疏上命改兵部主事赴象昇行營贊畫

十一月初七日召三品以上及科道官入對是日大風霾久之上傳俟風少息進見諸臣叩頭畢上曰在內之賊深入南方關外又報有賊作何剿禦錢糧平時壓欠今有警一月費折色三十萬本色二十萬作何措置接濟有良策面奏來良久言調度方畧紛紛不一至言錢糧無措則有言今在京官民合助者有言令在京官與親識商人借貸俟

皇上財用有餘遣之否則各官回家變產遣之科
臣范淑泰獨奏戎事要在行法法不行而憂餉卽
天雨粟地湧金何益上曰朝廷何嘗不欲行法淑
奏云今□臨城尙無定議不知是要戰是要款上
問主款之說何來對言外邊有此論議又言凡涉
邊事卽報一切不抄傳外邊皆以爲諱上曰關係
機密不許抄傳若塘報如何不抄傳上命閣臣卿
等過來諸臣平日營私不實心做事有實心者又
憂譏畏譏不敢做所以如此若平日用心只以朝

廷之事爲事焉有不濟之理可將諸臣面奏的同
商酌奏來樞臣嗣昌奏盧象昇先言欲南去留高
起潛在京防守已又言奉旨會同似難獨往仰請
聖裁或留或遣上曰象昇一人豈能獨剿嗣昌奏
三協撫道守令須得人因及推舉之難又言設處
錢糧無策欲權開事例行之南方上曰親民官取
償於民不可開其餘斟酌開來

十一月初十日兵陷高陽原任少師大學士孫承
宗死之子五人孫六人與從子孫八人皆死婦人

童稚共同死者三十餘人諸子皆被儒服素鍛礪
丈行二郎壬子舉人鈐四郎秀才鎔五郎尙寶司
丞鎔尤奇偉善騎射曉兵事賊陷之日鎔解裘血
戰死於城下鈐戰敗不屈死鈐子中書舍人之沆
秀才之滂皆死三郎鈐之子秀才之璟被執誑曰
引我得見宰相以金帛與汝曳至老營見其祖拜
而起卽援手大罵而死鎔之子尙寶丞之洁鎔之
子之懣與六郎鎔七郎鎔皆戰死城下鎔被重傷
卧積屍中家僮侯果自任邱逃歸見之脇中三矢

鏃深不可拔口張不能言果負之歸城南庄見水
半飄灑之氣上而絕果以十四日得主屍于圈頭
以次行求諸子孫屍乞於親戚松棺柳窆歛以粗
布而鑰鑄二屍終不可得事聞上惻然念慘及閤
門首命優恤當國者格其事久之部始題覆僅復
官予祭葬或曰高陽令雷覺民首輔薛國觀私人
也盡逐平日守城官兵尅其餉以致城陷事敗逃
匿國觀所長孫錦衣之芳詣闕籲天語侵縣令以
此逢國觀之怒故卹典不獲全給

孫公在天啟時督師關門鎮守有功以忤逆奄而罷已巳之役復起原官出鎮二年邊警頓息又以其爲諸正人之領袖也構而罷之至是城破殉難完節全歸亦何憾哉

首輔劉宇亮請躬行視師上命革總督盧象昇任聽勘以劉往代十二月初六日上御平臺召見宇亮奏謝言原題督察驅勦畿輔雲晉惟賊是求非敢獨當一面今奉命代總督未免是一面之任不能督察諸方上諭鑒卿忠愍定可成功故有此委

任行間有一總督賜尙方行事無以復加如止營
差驅剿不過是監軍豈有監軍用如此大臣楊嗣
昌亦奏請行上曰一時輔臣無遣兩員之理諸輔
薛國觀等同奏首臣宇亮初具揭時臣等咸言事
體重大且兵將不相習還該斟酌上以成命已頒
未便收回劉出未幾終以無功罷歸時謂同事者
有意逐之也

十二月十一日總督盧象昇率兵逐□于賈庄兵
敗死之時盧雖擁總督虛名兵寡餉缺呼應不靈

既奉革任聽勘之旨時中樞爲難必不相容因親率兵尾敵索戰追逐十里手砍數級三鼓還營□兵大隊圍賈庄營中對面不相視大帥虎大威猶能認盧力挽其馬盧以鞭擊其手不肯出圍縱馬血戰自辰至午矢盡力竭左乳忽中流矢方抽矢出鏃已復腰中一矢左右股各中一矢胸後右腮面門各中一刀遂歿于陣從殉者義男顧顯掌牧楊陸凱二人至十五日副將劉欽始獲其屍贊畫楊廷麟迎至真定東關新年二月二十八日始克

大斂距死之日已八十日矣同死者衆屍枕籍不可辨盧以首戴白網巾故識之總監高起潛匿不以聞贊畫報至上曰大臣陣亡豈不可惻恨其調度舛錯不准予卹蓋入楊嗣昌之譖也于總張國棟報至兵部嗣昌欲緣飾逗怯之狀上聞國棟不肯嗣昌大怒欲刑之國棟曰死則死耳忠臣而以爲逗力戰而以爲怯何可誣也始愧而釋之

廷麟之題贊畫也因其疏忤本兵兼以沈張之憾故相比爲謀實欲假手于盧以殺之盧未出

師之前遣廷麟之真定與孫傅庭議事不及於
難敗屢報至嗣昌首先問曰楊翰林死否報者
止知贊畫不知翰林爲誰嗣昌再問曰楊贊畫
死否報者答以已先奉差不在營中嗣昌爲不
豫者久之嗟乎敗報之至正國事危急之日宜
何如震懼失措乃止計及私仇未死者欲其死
已死者欲飾以罪大臣心事如此

盧公爲吾郡宜興人少年登第夙負英畧兩任
畿輔府道卽以知兵聞迨爲七省總理所至躬

先士卒斬獲甚多賊亦畏之相戒不敢犯盧家
軍自盧去而賊益猖獗不可禦矣使當日終以
剿賊事任之必能成功調之于邊已不能竟其
用又以中樞之齟齬厄而置之于死地竟使人
才與國運同盡也悲夫

十二年己卯正月北兵自臨清分部東下掠破章
邱等縣直趨濟南城中新兵皆叛劫德王府開門
迎敵以德王殉於城下左布政張秉文叅政鄧謙
副使周之訓運使唐世能知府苟惟善同知陳虞

允通判熊獻知縣則歷城韓承宣臨邑朱希堯武
城李永芳博平張列宿荏平黃建樞章邱高仲光
等皆死之焚掠數日又出濟南向東北所過攻城
惟武定不下連破鹽山慶雲等縣復回哨破海豐
已由青山喜峯口出塞前後 月破順天二縣保
定九縣河間十一縣真定十九州縣順德六縣廣
平四縣濟南九縣兗州二縣東昌七縣共七十餘
城已蕩東省失事諸臣罪案以撫臣顏繼祖雖奉
命守德夙事虛伏削籍聽議後竟逮問同薊撫張

其平總監鄧希韶總兵倪寵祖寬等三十三人俱棄市順撫陳祖苞先服毒死其子編修之遴以丁憂請上追恨祖苞未正法命錮之遴永不叙用先是沈迅條陳有東撫不許離德州一步部覆如議繼祖遂認定汎地僉謂敵無越德而南之理不意竟由東昌破章邱夏津直趨濟南濟南精兵旣盡在德州城中無備當事又無方畧民潰遂陷德州聞省城陷兵心恇擾鼓噪挾餉繼祖懼急以數千金塞其望而兵遂不可用繼祖疏申言原派不許

離德州之語嗣昌力排之竟及於禍劉宇亮既自
請督師各鎮勤王兵皆屬焉時兵將皆視□所向
以爲趨避多蹂踐居民至安平偵者報敵至皆相
顧驚愕擬趨晉州城以避之晉州知州陳宏緒素
負韜畧閉門不聽入城中士民亦歃血爲誓不許
延入一兵劉大怒傳令箭且將以軍法從事宏緒
復語督師以剿敵爲任今□將至正建功之會奈
何反欲入城卒不聽劉遂疏劾之有旨逮問晉州
士民詣闕訟冤至願以身代知州之死者不可勝

計宏緒得以輕處降四級調用上乃頗疑督師擾民矣

劉旣由晉州而南行間大帥多尾□不敢擊亦不能擊劉上疏言之其末帶言劉光祚嗣昌與國觀謀以此去劉乃票光祚軍前正法旨到日諸大帥俱分道前去并光祚亦不在軍前況原疏中罪原不至死適有武清之捷劉乃置光祚於縣獄而復請之并上武清捷音奉旨倏叅倏叙殊屬乖藐着九卿科道看議嗣昌明知聖旨往還之間必致參

差必不能正法而逐劉之計行矣部覆劉宇亮冠帶閒住陳啟新言看重議輕沈迅言明旨森嚴考功之法未盡於是改議革職爲民國觀票旨仍候事平另擬此楊薛二人主謀排擠構陷甚巧故明旨止言看議而加以議處究之五案定而宇亮奉旨免議聖明亦知其無大罪也

張獻忠旣降復叛假官軍旗號暗襲南陽屯南關援剿總兵左良玉適至北關疑之使人召之獻忠窘逸去良玉追及之兩馬相望一箭中其肩一箭

中其指于弓靶獻忠愴惶開良玉舉刀劈其面血流被甲部下孫可望力前格之獻忠乃得脫逃至麻城良玉追剿之獻忠兩日夜馳七百里至穀城營於王家河戊寅正月初九日破穀城出示安民云本營志在匡亂已逐闖遠遁木營釋甲歸朝爾百姓其無恐遂拘耆老具揭遣可望通賄熊文燦內有西碧玉二方長尺餘又有徑寸珠二枚文燦遂一力擔當撫之二月良玉至襄陽巡按林銘球巡道王瑞旃欲誘獻忠來見執之文燦曰殺降不

祥力持不可獻忠恃文燦爲援益無忌私鍊士卒
鑄軍器穀城諸生徐以顯一見如故教以孫吳兵
法己卯春叛形昭著左良玉請討之文燦故張露
其事且強留良玉飲餞稽延時日俾獻忠得預爲
備獻忠乃得從容運器甲資糧入房山部署已定
文燦始出令進兵良玉恚曰督臺縱虎負嵎使我
櫻之不去必以逗遛罪我令旗至卽冒暑進討遇
伏大敗良玉乃列其事於朝樞輔楊嗣昌劾之以
十一月逮文燦付法司擬罪至庚辰十月棄市次

三事野乘 卷六
年復逮總督鄭崇儉下獄以縱兵壇回失誤軍機
爲罪擬辟以五月棄市其罪實輕於文燦竟同罹
大辟論者爲鄭寃之

樞輔楊嗣昌疏議州縣召募鄉兵須專訓練之任
或更府佐一員爲將領州佐一員爲守備縣佐一
員爲把總裁訓導之一爲武職府率一千州七百
縣五百其工食或量於地畝或取於牙行或富義
之捐貲或居民之絕產設法通融以倣古時文武
相兼之制上俞行之工部侍郎張慎言疏言其不

便者數事上命責成撫按詳議究竟徒滋騷擾未能畫一奉行也嗣昌先又有考試生童必兼試騎射議鄉試副榜准作恩貢送入國子監行積分法其數視正榜之半先一日發榜以杜私弊俱允行後副榜貢至京送監但考一二優等便以科道自居卒之未嘗用一人得一人也次科乃停不行御史王綬奎劾陳啟新緘默失職上責其妄下都察院議處僉都李光春議以罰俸上不悅竟謫調外任以吏部董羽宸不能駁正奪俸六月上怒光

春不已罷黜之然啟新之用上亦悔之只是不肯
認錯其後姜採上互糾之疏下部看議部議有刀
筆之語上不悅諭輔臣曰處分可矣管他甚刀筆
八月命大學士楊嗣昌督師討賊賜尙方劍督師
輔臣銀印給帑金四萬賞功牌一千五百蟒紵蟒
絹各五百九月陞辭賜晏平臺後殿復賦詩以寵
其行詩曰鹽梅今日作干城上將新開細柳營一
掃寇氛泛此靖還期教養遂民生所以寵之者至
矣嗣昌馳至武昌申明軍令鼓舞將卒一時赫然

有賊黨劉國能來降國能者陝西諸生眾亂推爲帥至是降于嗣昌嗣昌造其壘信宿而返國能感動傾生嗣昌先遣兵搜捕李自成自成跳入雒陽深山中不可得而均州賊帥王光恩亦未降嗣昌以左良玉所部多降將謂可倚以辦賊疏請於上拜爲平賊將軍又奏辟永州推官萬永吉爲軍前監紀次年二月復賜內帑萬金賜斗牛服又賜海驢馬一棗驢馬一嗣昌駐軍襄陽乃調各路兵會剿時老回回革裡眼左金王南營四股合二萬

人分屯南直英霍潛太諸山寨犯安慶桐城諸路
遼將黃得功川將杜先春屢戰屢却賊每避兩軍
賊多購斬黃人爲間或携藥囊著蔡爲醫卜或談
青烏姑布星家言或爲緇流黃冠或爲乞丐戲術
分布江皖諸境覘虛實時時突出焚掠毒流四境
十三年庚辰正月考察天下官員東廠緝獲賄冊
進覽命掌科阮震亨掌道周堪賡回奏吏部尙書
謝陞疏叅震亨通賄敗類有據命下震亨竟死杖
下又逮劣處貪官浙寧布政姚永濟等三十七人

下刑部獄究問先是丁丑外計永濟以錢銀積欠部覆爲民浙省在京諸紳溫體仁姜逢元等五十餘人合詞保留稱永濟居身廉慎核弊嚴明爲泛來方伯之冠乃准降級管事至是又以貪處若追問前此保舉之罪不知何以解也

仙居知縣過周謀爲薛國觀門生托同鄉吏部員外熊文舉營轉禮曹令文舉之父貽書入京隱語餽國觀五百金時文舉方奉陝西典試命未還京也送書人爲東廠緝獲上聞國觀疏辨命逮文舉

父下獄究問文舉具疏爲父代罪不允與周謀俱遣戍

文武品官服色祖制既定奉行已久惟是武弁槩服獅子上至是重行申飭武臣三四品俱照制服虎豹至內臣從無定式蓋直擯之洒掃服役之末祖制良有深意雖太監極尊止於正四品間有賜蟒不過舊衣之賞賚耳是時上取山海經進覽採取各種獸名定爲服式以天駟爲極品識者謂至尊左右環列異獸蓋不祥也

庚辰三月十五日上御皇極殿策諸進士上乘步輦降殿階從容周視距諸士几案咫尺上親閱試策諭禮部傳臚展期十九日傳旨召進士楊瓊芳等至會極門中使執名冊傳呼某人等四十人至文華門外序立上御殿諸進士行五拜三叩頭禮畢上諭曰爾等前日所對策切實的固有浮泛的亦多特召爾等四十人來問滅□雪耻事爾等學問之功既久時勢之感又深各將胸中所見明白奏來如切實可用朕不拘常格用諸士承旨起過

東遍立中捧一黃綾函傳御題十幅卽面諭語每
四人共閱閱畢以次跪報姓名對上注聽甚殷執
御筆書錄數語或有名註圈點者分十班對舉行
禮出二十日傳臚賜魏藻德葛世振高爾儼及第
又傳聖諭昨召諸士奏對明爽者趙玉森姚宗衡
劉煊係一脈嚴似祖着授翰林黃雲師周延儒宣
國柱周鼎李如璧授科員馮垣登陳純德陳羽白
魏景琦吳邦臣授御史稍明者董國祥顏渾張朝
縱葛奇祚錢志騶張經呂陽盧若騰蔡肱明日有

年授吏兵二部司務卽行察缺填補初閣中照例進十二卷上命取餘卷至再三皆以十二卷進其至四十餘卷皆一一召對親拔數人藻德北通州人自言三次守城功上心識之遂拔第一壬午冬復以面對稱旨超拜詹事入閣旋正首揆甲申之變不能殉節爲賊夾辱而死負恩甚矣

上以考選不列舉貢傳諭吏部將廷試就教舉人貢生二百六十三人吳康等悉照進士選授部寺司屬推知等官此係特用後不爲例於是與選

者遂豎黃旗竿稱御進士此一奇也然卒無一人
有用可副破格特恩者江西巡撫解學龍疏薦布
政司都事黃道周有學術直貫天人品行無忝周
孔等語上以道周黨邪亂政學龍徇私藐法俱着
緹騎逮問工部主事葉廷秀上疏救之上怒甚命
廷杖廷秀一百道周學龍各八十俱仍下刑部擬
罪國子生涂仲吉復上疏言道周清忠苦節昔唐
太宗恨魏徵之面折至欲殺而終不果漢武帝惡
汲黯之直諫雖遠出而實優容皇上欲遠法堯舜

奈何出漢唐主下通政司格之不上仲吉併劾通
政司施邦曜遏抑言路上怒逮仲吉廷杖一百邦
曜革職下道周等鎮撫司打問逼供同黨鍛鍊甚
酷乃指數員塞責因及通政馬思理編修黃文煥
吏主事陳天工工部司務董養和中書文震亨俱
下獄有崑山諸生朱永明持百錢貽仲吉亦在繫
中刑部司官吳文燦遲案不上廷杖六十革職爲
民諸人杖皆不死得錦衣郭承昊調護力也刑部
尙書李覺斯亦革職爲民一番具招一番嚴駁淹

滯獄中一年餘至宜興再召片語回天始得解網

事詳後卷

是時武陵亦已自盡矣

大學士薛國觀冠帶閒住給事中袁愷再疏劾其
納賄有據并及吏部尙書傅永淳刑部侍郎蔡奕
琛等並免官又逮左副都御史葉有聲下刑部究
問時株連頗眾旋遣緹騎逮國觀到京賜自盡籍
沒家產入官國觀初與嗣昌比謀去劉宇亮遂正
首揆並無忌憚任用私人王陞彥通賄賂于外怒
老中書周國興楊餘洪不爲用捏洩旨事叅之皆

斃於廷杖兩人之家遂密緝其納賄事件報於東
廠令其事件密聞於上上心動久矣適史堇死所
輦多金爲布置地者皆入於國觀周楊二家嗾堇
之家人出首事已上聞錦衣衛提其長班鞠問供
吐甚詳國觀疏辨猶稱楊士聰之叅史堇別有緣
故又稱堇曾叅黨人袁崇煥等爲黨人報復云云
已而奉旨議處私人王陞彥下獄部覆國觀閒住
出都之日賍私纍纍用車數百輛兩家復聳邏卒
具事件密奏聖心益怒特旨王陞彥卽着會官斬

決而國觀復逮凡招上或斬或絞卷中已詳奉旨止云卽着會官處決今陞彥招未成教自聖斷故

云斬決此旨從來所未有也

後吳昌時之斬奉旨亦與此同人謂陞彥

之罪實由昌時設謀搆成故天報不爽

國觀逮至候命外寓而勒令

自盡之旨下時已高卧家人報錦衣賞詔至蹶然

曰我死矣倉卒覓小帽戴之宣詔已畢俯首不能

出聲自盡後緹帥驗視回奏次日始奉旨准收斂

蓋懸梁者凡兩晝夜云

崇禎十四年辛巳正月十一日流寇李自成陷維

陽福王自殺先是河南撫鎮分汎禦寇總鎮王紹禹主守維城賊在宜陽永寧殺王戮官紹寧卽揭報撫臣且盟在城各官分門堅守羅劉二將營於城外十九日賊至羅劉戰敗賊遂抵城下二十日力攻一日至更餘有呼喊於城上者兵士盡譁先報執三守道索糧王府中人開北門放賊入守道王允長知府馮一俊鄉官尙書呂維祺等寺副邢紹德俱不屈死賊入王宮執福王將擁戴之云神宗皇帝原有意傳大位於大王王叱之曰我從不

聞此語何敢背義造誣賊又請王諭筆王不可賊
遂以繩進請王自裁王又叱曰任汝殺我賊遂共
縊殺之有小內官崔升勸王寧死勿屈抱王至死
不去并見殺兩承奉告賊以棺殮王屍亦卽自殺
賊盡焚王宮留十餘日煮粥以食飢民又考賞秀
才於二月初二日棄城開營一路上魯山一路上
汝州劫掠滿載云云後授書辦邵時昌爲總理統
守雒城閱一月後巡撫李仙風至孟縣誘執賊將
以兵臨雒城時昌開門迎入仙風遂以恢復奏聞

言福王受驚病死旨責其欺飾逮下獄論斬二十四日上御乾清宮召閣部科道諸臣入諭曰朕御極十四年國家多事復遇飢荒流寇猖獗近且攻陷雒陽福王被害夫親親仁民仁民愛物親叔不保皆朕不德所致真當愧聲泪俱下閣臣奏此係氣數所致上曰說不得氣數就是氣數亦須人事補救年來何曾補救得幾分召兵科張縉彥命將河南事奏來縉彥奏福王遇害是真遇害時有內員環泣不忍去上問何名縉彥奏是崔升又問世

子有何人跟隨縉彥奏聞有王府校尉數十人上長嘆汨下因奏福王身死社稷葬祭懋問都宜從厚上曰說得是因召禮科諸臣曰朕欲差一員前去各奏來李焞奏督師出兵一年有餘惟初次有瑪瑙山一小捷今遂寂然須另遣大將幫他上曰督師去河南數千里如何照管得到你們亦當設身處地李焞奏正因其照管不來故請再遣上曰已遣朱大典便是大將章正宸奏闖賊從四川來樞臣陳新甲旁立急應曰自秦來不自川來言至

再蓋從川來則責在嗣昌也上召新甲論曰卿部
職司調度須爲朕執法如姑息俟事皆卿部之罪
緒彥奏維封失陷凡王府宮眷內外官紳士民焚
劫甚慘急須賑濟上曰朕卽措發諸臣叩頭退卽
傳諭駙馬都尉冉興讓太監王裕民禮科葉高標
前去河南慰問世子詳察福王宮眷存亡及殉難
官民人等除前發賑濟銀三萬兩外御前發銀一
萬兩坤寧宮四千兩承乾宮三千兩翬坤宮二千
兩太子一萬兩慈慶宮一千兩慈寧宮皇祖昭妃

五百兩望考定妃五百兩賚去支用

二月初 日張獻忠陷襄陽殺襄王屠王府官民人等數十萬人先是嗣昌在本部時議練兵十餘萬於各邊特加練餉之數至是卽撥練餉爲勦寇之用餉足而民怨已極嗣昌進勦張獻忠獻忠出戰墜馬幾被擒逸出逃入瑪瑙山中嗣昌令降將劉國能圍之獻忠食盡分兵四出抄掠不得糧者歸卽殺之其未歸者懼殺詣軍門降國能將之前行僞稱糧至獻忠開營延入國能乘其不意縱火大

戰掃其營壘擒其妻孥及賊黨徐以顯潘應鰲等
送襄陽獄獻忠批藤墜岩澗逃士卒直走四川隨
又困之竹溪房縣大兵四面固圍無毫髮間隙可
容片甲遁去而蜀撫邵捷春與嗣昌不相合又聽
譏殺戰將楊茂選軍士皆怒於是夔關失守賊復
逸出部署稍定復返湖廣假稱楊閣部兵至坐乘
八轎併民扛火藥文書印信皆同道府不疑延之
入城城上火起賊盡入合城鼎沸獄中者俱出與
之合先攻襄王府執襄王坐之堂下獻忠勸以卮

酒曰吾欲斷楊嗣昌之頭而嗣昌遠在蜀今當借
王頭使嗣昌以陷藩伏法王其努力盡此一杯因
縛王殺之隨焚其屍又殺貴陽王常法等四十三
人承奉閭國鼎等八人知府王承曾保福清王常
澄得脫督輔楊嗣昌在荊州聞變懼禍遂自縊時
三月朔日也監軍楊卓然以病故聞上諭部院嗣
昌雖二載辛勞一朝盡瘁有瑪瑙山等諸捷不能
掩闖獻鴟張兩藩懼禍名城屢陷殺掠頻聞雖病
故還着九卿科道會勘議罪

先是熊文燦檄僉事張大經監獻忠軍大經初至
爲陳說禍福獻忠頗爲致敬及文燦措置乖方獻
忠遂拘大經爲質大經悔爲文燦所賣鬱鬱死於
房縣山中獻忠駐扎穀城時知縣阮之錕多方調
護士民賴之獻忠叛之錕瀝血書絕命詞於襟仰
藥死其破襄陽也知縣李天覺北面叩首置印於
案自縊死推官鄭曰廣被執不屈死嗣昌之初出
督師其輜重盡裝入大統中寄於固始縣庫死後
知縣時敏盡取之以歸不下數百萬敏以此營升

兵科甲申降賊後先爲鄉里搶掠其半乙酉之變盡行燒毀併殺其身焉今其子且不免負薪矣嗟嗟此皆民脂民膏也天意豈容若輩安享哉

蜀撫邵捷春爲楊嗣昌疏叅奉旨差官旂逮問捷春夔關之失不爲無罪然在地方實得民心軍民因闕然遂散官旂蜀王爲之疏請奉旨朝廷大法豈容百姓阻撓邵捷春着巡按差官護送來京下刑部究問坐以失悞軍機決不待時斬旨未下而先一日報卒上疑有洩漏情弊并處該司官

自邵捷春得罪後繼之者爲陳士奇但清謹而無禦亂才故蜀事益不可爲矣蜀紳初舉臬司馬乾者得民心有邊才宜推爲撫當事以其爲乙榜也故抑之而別推噫此何時何地而猶拘資格耶

諭吏部凡遇侍郎巡撫員缺須將資深翰林同推各部侍郎仍許兼侍讀學士惟巡撫不許於是推詹事李紹賢爲戶部右侍郎督理錢法未幾又推原任祭酒倪元璐爲兵部侍郎

刑科胡周鼎疏言外戚張國紀所紀懿安皇后事
當日岌岌可危今皇七子降生宜加聖后徽號上
以其無端突發疑窺伺宮幃令回奏旋革職下獄
內閣范復粹奉旨清獄因奏各犯官六十六名內
而尙書侍郎都察院科道部屬外而督撫司道府
縣等官無不畢具如原任尙書侯恂傅宗龍府丞
戴澳巡撫黎玉田常道立方孔炤給事宜國柱耿
始然御史成勇魏景琦兩司范良彥賀鼎司屬倪
嘉慶孫嘉績熊汝學朱國壽朱日嶸諸犯各殊幽

沉則一當下部作速清理又特舉原任江西布政
朱之臣總兵劉光祚之才乞復光祚官起用奉旨
朱之臣准還職劉光祚准軍前効用

應天巡撫黃希憲奏報擒獲江海大夥黃尙忠得
空船四十餘隻爲總兵王之仁守備湯夢復之功
蓋尙忠不過海上販鹽之徒非寇盜比也撫臣聽
信將領妄報邀功從此海上日多事矣上諭吏部
以時事多艱佐理須人舊輔周延儒張至發賀逢
聖俱忠猷未竟各起原官入閣辦事着該撫按官

敦請就道三臣各具疏辭不允閣中自戊寅年特
用楊嗣昌等五人後己卯年又用費縣張四知滑
縣魏照乘蘄水姚明恭三人庚辰年又用德州謝
陞井研陳演二人自 谿病故韓城得罪武陵督
師出其餘相繼去位是閣中止范張魏謝四人而
范亦旋予告矣一時諸輔皆無有當聖意者眾推
宜興才智可以仰副且林居以來又能化洛蜀之
異同皈依眾正優容敗類於是庶吉士張溥禮部
員外吳昌時輩爲之營謀涿州舊輔與商邱桐城

輩亦極力資通於內璫竟得召用雖并及張賀二人而意則專在周也故二人到不久亦卽罷去時朝政嚴切歲事凶荒兵餉掣肘臺省是非訐直至爲棘手矣

蓋政府自烏程之後繼以溜川韓城皆祖述故智媚疾賢才盈廷重足久無樂生懷矣宜興甚憂之惟濟之以寬首引用先朝故老如劉山陰鄭建德輩召還言事遷謫科道復註誤舉人廣取士額釋漕白欠解戶併蠲民間積逋赦宥戍

罪悉還家再陳兵殘歲歉地減現年兩稅蘇松
常嘉湖各府許以次年夏麥代漕兌將佐功罪
賞罰不踰時至卹死褒忠等事尙期期不予者
皆朝報夕下天下仰望丰采如久污得沐宿弊
臨春之快又特請撤回監視璫差停止廠衛緝
事尤爲不易得之數使天欲平治則循此不變
豈非救時宰相卽繼美國初三楊無愧矣乃美
不克終竟使身名與國運同盡也悲夫

論吏部吏科曰朕惟足國貴在阜民強兵要在擇

將今國用日煩民生日困朕心如傷每議足用則必取之於民言卹民則又慮詘於賦國與民無並足之方矣建牙設鎮不知凡幾推轂徒勤登壇罔効豈以天下之大竟無明習心計謀裕折衝者乎朕拊髀側席未獲一遇意者數求之道未盡也今特開裕國足民科奇謀異勇科使海內人士望的而趨有以自見至訪求考驗徵辟選舉更須良法務期豪傑傾心弓旌生色以稱朕破格旁求至意該部科詳議規則來行

四月差勲臣朱純臣戚臣劉文炳禮臣林欲楫攜
帶曉地理的往南京會同守備太監南京禮部官
恭詣孝陵循行察勘附陵三十里地方及龍脉經
行之所俱不許燒灰作窖并泗州祖陵鳳陽皇陵
一并察勘時有奸民誑奏地方居人侵傷陵脉者
故有此遣上先期御中極殿召閣部文武諸大臣
面詢再三各賜坐宴於殿上又賜欽遣三臣路費
采段

蔣德璟曰中極舊名華蓋嘉靖中易今名前卽
皇極後爲建極雖相連而中極特爲高閣上寶

座周圍刻金龍形諸臣就席時上以齋不用酒
止用茶計十三人人各一席席各三十餘器皆
御膳所蔬菓甚潔精非光祿寺蔬也上坐覽文
書司禮大璫旁立時晚承旨而諸臣左右坐宣
德後久無此禮矣祖制宴羣臣多在午門文華
門外惟郊禮慶成宴三品及學士在皇極殿內
永樂中召坐西內園殿宣德中召宴萬歲山廣
寒殿嘉靖中賜宴西苑不聞侍坐蓋正統中坐
禮久廢矣今上十三年始議行之而
中極自國初賜宴親王外未有也

上既遣三臣往南成國時總督京營戀戎政印因
疏請帶印往南又請帶京營兵千人護行托言便
道護糧艘北來相機剿寇上已許之部科俱疏言
其非十八日上復召諸臣入諭三臣曰勘陵重典

三公正卿帶千兵不爲多但須嚴禁騷擾成國因
言諸臣阻撓上曰他們說的亦是地方供應難且
既有關防京營印不須帶去若言勦寇不將勘陵
事悞了糧船北來此去南去亦難兼顧京營印外
面亦行不得只交協理侍郎收了

蔣德璟曰時部科疏並入成國甚以阻撓爲恨
若各將疏意發揮幾成聚訟上一出不言有疏
但戒諭再三嚴禁騷擾並解其京營印諸臣見
其言之行不須再開口彼此無爭形跡不露居
然杯酒釋兵
權作用也

北兵圍祖大壽於錦州填濠毀塹聲援俱絕有卒

四人間出云城粟足支半年苦乏薪耳傳大壽詣
宜以車營逼之毋輕戰總督洪承疇集兵待援未
決奏聞上憂之召問中樞陳新甲計將安出新甲
求退與閣臣侍郎等酌議請遣司官面商於承疇
時有七可憂十可議之奏祈皇上察報國遣郎張
若麒往行營酌視若麒謂急戰之便相持數日官
軍大敗則自若麒之催戰爲之旋逮若麒下獄擬
罪五月赦兵部尙書傅宗龍於獄以右侍郎兼都
御史督兵討賊九月宗龍率兵至新蔡與保楊文

岳之兵會賀人龍將秦兵虎大威將保定兵共結
浮橋渡河合兵趨項城初五日兩軍畢渡走龍口
自成汝才亦結浮橋於上流將趨汝寧覘官兵至
盡伏精銳於松林中諸賊悉力死戰諸軍星散宗
龍率散卒且戰且走次日至項城賊追及被執至
門下大呼於門曰我秦督臣也請啟門納秦督宗
龍大呼曰我不幸墮賊手左右皆賊毋爲所給賊
唾宗龍龍大罵曰我大臣也死則死耳宗龍遂遇
害自是山陝無復寧宇矣

十一月陝西巡撫汪喬年率總兵等三萬趨河南自成聞之率賊來迎戰喬年安營未定有二將先逃官軍潰賊乘之一軍盡覆喬年以數百人入城居守五日城復陷喬年被執見殺

十二月黃道周解學龍涂仲吉各擬煙瘴地永成葉廷秀邊戍黃文煥分別配杖初刑部尙書劉澤深擬道周永戍上不允因上言曰道周之罪前兩疏已嚴矣過此惟有論死自來論死諸臣非封疆則貪酷未有以建言蒙戮者當此生死之關不敢

不存一難慎之心敢仍以原擬上疏入允之

黃景昉撰黃公行狀畧云江撫解公陞任薦僚屬疏例下部不足勞萬幾聞有僉貼其旁致上怒者遂得扭逮之命比入獄廷杖擬罪屢嚴駁聲息洶洶莫必其命余爲拉同鄉蔣德璟等謁謝德州請之謝太息曰死矣遲秋爲幸聞之失色總承韓城壽炎之後餘威尙震武陵雖出督師柄得逢叅宣督遂入爲中樞同憾公前疏刺骨同年費縣井研交誼漠如滑縣且下石矣宜

與周公新召至眾喁喁望丰采諸名流力慫恿
之婉代開釋得免死改戍周公又於講筵平章
他䟽馴語及公余與蔣公同贊其說初冀得脫
戍幸矣竟復原官實出望表本聖主乾斷度越
百王天下亦以是亮周公焉

三朝野紀卷六終